

Penguasaan Bahasa Inggeris Penting Untuk Hadapi Era Globalisasi – Jainab Bernama
23 Julai, 2012

KOTA KINABALU, 23 Julai (Bernama) -- Penguasaan bahasa Inggeris, yang merupakan antara bahasa antarabangsa yang utama, oleh para pelajar sekolah rendah penting bagi membolehkan mereka mahir berkomunikasi dalam bahasa itu terutama dalam menghadapi cabaran era globalisasi.

Pembantu Menteri Pembangunan Sumber dan Teknologi Maklumat Negeri Datuk Jainab Ahmad berkata pihaknya mengharapkan lebih ramai murid sekolah, khususnya di Sabah, mempunyai kebolehan memahami dan bercakap dalam bahasa antarabangsa itu yang merupakan satu kemahiran tambahan kepada penguasaan bahasa Melayu yang mantap.

Katanya tidak ramai murid sekolah rendah di negeri ini yang menguasai bahasa Inggeris dengan baik, malah lebih menyedihkan ada yang langsung tidak memahaminya.

"Penguasaan bahasa Inggeris penting lebih-lebih dalam era globisasi dan ICT sekarang ini. Pembelajaran bahasa Inggeris di dalam kelas tidak mencukupi untuk menguasai bahasa ini dengan baik.

"Para pelajar perlu mempraktikkannya dalam kehidupan seharian. Jangan malu untuk bertutur dalam bahasa Inggeris, belajarlah daripada pengalaman. Apabila selalu bertutur dalam bahasa Inggeris, penguasaan bahasa itu akan meningkat dari semasa ke semasa," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=682432>

